

詞苑萃編

詞苑萃編卷之十三

南匯馮金伯治堂輯錄

句容裴暢芝亭參訂

紀事四

慈寧殿賞牡丹時椒房受冊三殿極歡高宗洞達音
律自製曲賜名舞楊花停觴命小臣賦詞令內人歌
之以玉卮侑酒爲壽左右皆呼萬歲詞云牡丹半折
初經雨雕檻翠幕朝陽嬌困倚風臺樹遶羣芳洗煙
凝露向清曉步瑤地月裏霓裳輕笑淡拂宮黃淺擬

飛燕新妝。楊柳啼鴉。畫永正千秋。亭館風絮池塘。三十六宮。簪豔粉濃香。慈寧玉殿慶清賞。占東君。誰比花王。良夜高燭。熒煌影裏。畱住年光。高宗又嘗使御前畫工寫曾海野喜容帶牡丹一枝。命呂本中作贊云一枝國豔。兩鬢東風。高宗大喜。貴耳錄

紹興中禁中避暑多御復古選德等殿及翠寒堂納涼。長松修竹濃翠蔽日。層巒奇岫靜竊紫淡與瀑飛空。下注大池可十畝。池中紅白菡萏萬柄。蓋園丁以瓦盎別種分列水底。時易新者。庶幾美觀。又置茉莉

素馨建蘭麝香藤朱槿玉桂紅蕉閨婆簷葡萄等南花
數百盆於廣庭鼓以風輪清芬滿殿御榻兩旁各設
金盤數十架冰雪如山紗厨前後皆懸掛伽蘭木真
蠟龍涎等香珠百餘蔗漿金盃珍果玉壺初不知人
間有塵暑也。洪景廬學士嘗賜對於翠寒堂當三伏
中戰栗不可久立。高宗問故。遣中貴人以批綾半臂
賜之。則境界可想見矣。景廬作詞紀恩而出。周密歲時記
隆興元年五月三日晚胡銓侍上於內殿之秘閣蒙
賜金鳳牋就所御玉管筆并龍腦墨鳳珠研又賜以

花藤席命銓視草畢喚內侍司廚滿頭花備酒上御
玉荷盃銓用金鴨杯令潘妃唱賀新郎蘭香執玉荷
盃上自注酒賜銓曰賀新郎者朕自賀得卿也酌以
玉荷盃者示朕飲食與卿同器也銓再拜謝賀新郎
詞中有所謂相見了又重午上曰今重午不數日矣
詞中又有湘江舊俗之句上曰卿流落海島二十餘
年得不爲屈原之葬魚腹者皆天地祖宗之靈畱卿
以輔朕也銓流淚上亦黯然俄而遷坐進入寶羹洗
盞更酌上命潘妃執玉荷盃唱萬年歡此詞乃仁廟

所製上飲訖親唱一曲名喜遷鶯。且謂銓曰。朕每在
宮中。不妄作歌。祇侍太上宴時。有旨令唱。始作之。今
夕與卿相會。朕意甚歡。故作此樂。卿耳。又曰。昨朕苦
嗽。故聲音稍澀。卿勿嫌。銓奏曰。太上退閒。陛下御宇。
正當勉力恢復。然此孝養。亦宜時有。上曰。卿真忠臣
也。漢之汲黯。唐之魏徵。亦不過是。上又問銓在海南
時所作詩文。銓一一奏對。時漏已四下。上又凭闌四
望。頃之天竺鐘聲已動。御苑已鴉噪矣。潛庵老人
玉音問答
乾道三年三月初十日上遣使至德壽宮奏知太上

連日天氣甚好欲一二日間恭請車駕幸聚景園看
花取自聖意選定一日太上云傳語官家備見聖孝
春和景明正可游豫但出去祇爲看花今本宮後園
亦有幾株好花不若來日請官家過來閒看遂遣提
舉官同到南內奏過遵依訖次日進早膳後車駕與
皇后太子過宮起居二殿訖先至燦錦亭進茶宣召
知閣門并兩府以下六員侍宴同至後苑看花亦有
小舟數十隻供應雜藝嘌唱鼓版蕪菓與湖中一般
太上倚闌閒看適有雙燕掠水飛過傳旨令曾覲製

詞。遂進阮郎歸。云。柳陰庭院占風光。呢喃春晝長。碧
波新漲小池塘。雙雙蹴水忙。萍散漫。絮悠颺。輕盈體
態狂。爲憐流去落紅香。銜將歸畫梁。旣登舟。知閣張
掄。進柳梢。青。云。柳色初勻。餘寒似水。纖雨如塵。一陣
東風。穀紋微皺。碧沼鱗鱗。仙娥花月精神。奏鳳管鸞
弦。鬪新萬歲聲中。九霞盃內。長醉芳春。曾覩和進云
桃。靨紅勻。梨腮粉薄。鴛徑無塵。鳳閣凌虛。龍池澄碧。
芳意鱗鱗。清時酒聖花神。看內苑風光。又新一部仙
韶。九重鸞仗。天上長春。各有宣賜。
乾淳起居注

淳熙六年春車駕迎太上太后游聚景園乘步輦至
瑤津西軒都管劉景進新製汎蘭舟曲各賜銀絹是
歲太上聖壽七十有三上親捧玉酒船進太上酒斟
酒入船則船中人物花草俱動太上飲盡又至錦壁
賞花有牡丹十餘叢各有牙牌金字爲記又另採數
千朶插水精玻璃天青汝窑金瓶中太上前又獨設
沉香桌列白玉碾花商尊高三尺徑一尺三寸上插
照殿紅十五枝隨駕各官皆賜兩面翠葉滴金牡丹
御書扇沉香爲柄知閣張掄進壺中天一闋云洞天

深處賞嬌紅。輕玉高張雲幕。國豔天香相競秀。瓊蕊
清光如昨。露洗妖妍。風傳馥郁。雲雨巫山約。春濃似
酒。五雲臺榭樓閣。聖代治定功成。一座不動。四境無
鳴柝。屢有豐年天助順。基業增隆。山岳兩世明君。千
秋萬歲永享昇平樂。東皇呈瑞。更無一片花落。西湖志餘
淳熙八年元日上坐紫宸殿。引見訖。卽率皇后皇太
子太子妃至德壽宮。行朝賀禮。未初雪。大下。正是臘
前。太上官家大喜云。今年正欠些雪。可謂及時。太上
云。雪却甚好。但恐長安有貧者。上奏云。已令有司比

去年倍數支散矣。又移至明遠樓。張鐙進酒節使吳
琚進喜雪水龍吟詞云。紫皇高宴仙臺。雙成戲擊璫。
苞碎何人爲把。銀河水。翦甲兵都洗。玉樣乾坤。八荒
同色。了無塵翳。喜冰消太液。暖融鵲。端門曉。班初
退。聖主憂民深意。轉鴻鈞。滿天和氣。太平有象。三官
二聖。萬年千歲。雙玉盃。溢。五雲樓迥。不妨頻醉。細看
來。不是飛花。片片是。豐年瑞。太上大喜。賜鍍金酒器。
二百兩。細色段疋。復古殿香羔兒酒等。太后命本宮
歌版色歌。此曲進酒。太上盡醉。一更後。宣轎兒入便。

門上親扶上輦還宮

乾淳起居注

淳熙九年八月十五日駕過德壽宮起居太上因畱
坐看月晚宴香遠堂堂東有萬歲橋大池十餘畝皆
是千葉白蓮凡御榻御屏酒具香匳器用竝用水精
南岸列女樂待月初上簫韶齋舉縹緲相應如在霄
漢既入座樂少止太上召劉貴妃令獨吹白玉笙霓
裳中序上自起執玉盃奉兩殿酒并以累金嵌寶注
碗盃盤等物賜貴妃侍宴官開府曾覲恭進壺中天
慢一首云素飈颺碧看天衢穩送一輪明月翠水瀛

壺人不到。比似世間秋別。玉手瑤笙。一時同色。小按
霓裳。疊天津橋上。有人偷記新闕。當日誰幻銀橋。阿
瞞兒戲。一笑成癡絕。有信羣仙。高宴處。移下水精宮。
闕雲海塵清。山河影滿。桂冷吹香。雪何勞玉斧。金甌
千古無缺。上皇大喜曰。從來月詞。不會用金甌事。可
謂新奇。賜金束帶紫番羅水晶注盃一副。上亦賜寶
蓋。古香至一更五點還內。是夜隔江西興。亦聞天樂
之聲。同上

淳熙十年八月十八日上詣德壽宮恭請兩殿往浙

江亭觀潮百戲撮弄等各呈伎藝太上喜見顏色曰
錢塘形勝東南所無上起奏曰錢塘江湖亦天下所
無有也太上宣諭侍宴官令各賦詩江月一曲至晚
進呈太上以吳琚爲第一其詞云玉虹遙掛望青山
隱隱一眉如抹忽覺天風吹海立好似春霆初發白
馬凌空瓊鼉駕水日夜朝天闕飛龍舞鳳鬱蔥環拱
吳越此景天下應無東南形勝偉觀真奇絕好是吳
兒飛彩幟蹴起一江秋雪黃屋天臨水犀雲擁看擊
中流楫晚來波靜海門飛上明月兩宮竝有宣賜至

月上還內

同上

庚申八月太子請兩殿幸本宮清霽亭賞芙蓉木樨
韶部頭陳盼兒捧牙版歌尋尋覓覓三句上曰愁悶
之詞非所宜聽可令陳藏一撰一卽景快活聲聲慢

李社陳
盼兒傳

紹興間洪景盧在臨安試詞科三場畢與數友同過
抱劍街孫氏伎樓夜月如晝正憑闌撫几兩燭結花
燦若連珠孫氏黠慧白坐中客曰今夕桂魄皎潔燭
花呈祥諸君較藝蘭省高掇無疑請各賦一詞爲他

日佳話座中有何自明卽操筆作浣溪紗詞云草草
盃盤訪玉人。鎗花呈喜座添春。邀郎覓句要清新。黛
淺波嬌情脈脈。雲輕柳弱意真真。從今風月屬閒人。
衆傳觀賞歎恨其末句失意景盧作臨江仙詞云綺
席畱歡歡正洽。高樓佳氣重重。釵頭小篆燭花紅。直
須將喜事。來報主人公。桂月十分春正半。廣寒宮殿
恩恩。姮娥相對曲闌東。雲梯知不遠。平步躡東風。孫
滿酌一觥。勸洪曰此瑞殆爲君設也。必高中矣。已而

景盧果奏名賜第。

詞苑

淳熙間御舟過斷橋見酒肆屏風上有風入松詞云
一春常費買花錢。日日醉湖邊。玉驄慣識西湖路。驕
嘶過、沽酒樓前。紅杏香中歌舞，綠楊影裏秋千。暖風
十里麗人天。花壓鬢雲偏。畫船載得春歸去。餘情付
湖水。湖煙明日重扶殘醉。來尋陌上花鈿。高宗稱賞
良久。宣問何人所作。乃太學生俞國寶也。重扶殘醉
原詞作重攜殘酒。高宗笑曰。此句不免寒酸氣。因改
爲扶殘醉。卽日子釋褐。中興詞話
武穆賀講和赦表云。莫守金石之約。難充谿壑之求。

故作詞云欲將心事付瑤箏。知音少，弦斷有誰聽。蓋指和議之非也。又作滿江紅，忠憤可見，其不欲等閒白了少年頭，足以明其心事。話

映

韓蘄王生長兵間，未嘗知書。晚歲忽若有悟，能作字及小詞。一日至香林園，蘇仲虎尙書方宴客，王徑造之。賓主歡甚，盡醉而歸。明日王餉以羊羔，且手書二詞遺之。其臨江仙云：冬日青山瀟灑靜，春來山暖花濃。少年衰老與花同。世間名利客，富貴與窮通。榮華不是長生藥，清閒不是死門風。勸君識取主人公，單

方只一味盡在不言中。其南鄉子云人有幾多般富貴榮華總是閒。自古英雄都是夢。爲官。寶玉妻兒宿業纏。年事已衰殘。鬚鬢蒼蒼骨髓乾。不道山林多好處。貪歡。只恐癡迷誤了賢。

西湖志餘

葉夢得九月望日與客習射西園病不能射因作水調歌頭以寄意云霜降碧天淨。秋事促西風。寒聲隱地初聽。中夜入梧桐。起瞰高城四顧。寥落關河千里。一醉與君同。壘鼓鬬清曉。飛騎引琱弓。歲將晚。客爭笑。問衰翁。平生豪氣安在。走馬爲誰雄。何似當筵虎

士揮手弦聲響處雙鴈落遙空老矣真堪惜回首望

雲中

詞苑

黨懷英辛棄疾少同舍屬金國初亂辛率數千騎南
渡顯于宋黨在北擢第入翰林二公皆有榮寵後辛
退閒有鴈鵠天詞云壯歲旌旗擁萬夫錦韉突騎渡
江初燕兵夜捉銀胡矛漢箭朝飛金僕姑思往事嘆
今吾春風不染白髭鬚都將萬字平戎策換得東郊
種樹書蓋紀其少年事也

歸潛志

辛稼軒摸魚兒春晚詞云更能消幾番風雨恁恁春

又歸去。惜春嘗怕花開早。何況落紅無數。春且休見。
說道天涯芳草迷歸路。怨春不語。算只有殷勤畫簷
蛛網。盡日惹飛絮。長門事。准擬佳期。又誤蛾眉曾有
人妒。千金縱買相如賦。脈脈此情誰訴。君莫舞。君不
見玉環飛燕皆塵土。閒愁最苦。休去倚危闌。斜陽正
在烟柳斷腸處。其詞可謂怨之至矣。聞壽王見此詞
頗不悅。然終不加罪。若遇漢唐。寧不賈種豆種桃之

禍哉。

鶴林
玉露

京畿有二酒。一呂措。一呂正。已措家諸姬甚盛。必約

正已通宵飲呂婆一日大怒踰牆詈之搯子一彈碎
其冠事徹孝皇兩漕卽日罷呂婆有女事辛幼安以
微事觸怒逐之今稼軒桃葉渡詞因此而作貴耳錄

按稼軒祝英臺近有寶釵分
桃葉渡烟柳暗南浦之句

南渡初金人追隆祐太后御舟至江西造口不及而
還辛稼軒過其地有感賦菩薩蠻詞曰鬱孤臺下清
江水中間多少行人淚西北是長安可憐無數山青
山遮不住畢竟東流去江晚正愁予山深聞鷓鴣詞苑
陳亮過稼軒縱談天下事亮夜思幼安素嚴重恐爲

所忌竊乘其廐馬。以去幼安賦破陣子詞寄之詞云。
醉裏挑鎗看劍。夢回吹角連營。八百里分麾下炙。五
十弦翻塞外聲。沙場秋點兵。馬作的盧飛快。弓如霹
靂弦驚。了卻君王天下事。贏得生前身後名。可憐白

髮生。

古今
詞話

劉子韋晦庵之師。以承務郎通判興化軍。辭歸隱武
夸山。有九日驀山溪詞云。浮煙冷雨。此日還重九。秋
去又秋來。但黃花。年年依舊。平臺戲馬。無處問英雄。
茅舍小。竹籬疎。兀坐空搔首。客來何有。草草三盃酒。

一醉萬緣空。休貪他金印如斗。病翁老矣。誰共賦歸歟。芟隴麥。網溪魚。未落他人後。

屏山集

黃公度以第一人登第爲趙忠簡所器而秦檜頗銜之。及召赴行在。知非當路意而迫於君命。故作青玉案詞有云。欲倩歸鴻分付與。鴻飛不住。倚闌無語。獨立長天暮。蓋去就早定矣。

知稼翁集跋

張于湖嘗舟過洞庭。月照龍堆金沙盪射。公得意命酒唱歌。所作詞呼羣吏而酌之曰。亦人子也。其坦率

皆類此。

四朝聞見錄

張于湖知京口王宣子代之多景樓落成于湖爲太
書樓扁公庫送銀二百兩爲潤筆于湖却之但需紅
羅百匹於是大宴合樂酒酣于湖賦詞命伎合唱甚
歡遂以紅羅百匹犒之。

癸辛
雜識

于湖玩鞭亭晉明帝覬王敦營壘處自溫庭筠賦詩
後張文潛又賦于湖曲以正湖陰之誤詞皆奇麗警
拔膾炙人口張安國賦滿江紅云千古淒涼興亡事
但悲陳迹。凝望眼吳波不動。楚山叢碧。巴滇綠駿追
風遠。武昌雲旆連天赤。笑老奸遺臭到如今。畱空壁。

邊書靜烽烟息。通輅傳銷鋒鏑。仰太平天子聖明無敵。蹙踏揚州開帝里。渡江天馬龍爲匹。看東南佳氣鬱。恩恩傳千億。雖間採溫張語。而詞氣亦不在其下。

吳禮部
詩話

宋女貞觀陳妙常尼年二十餘。姿色出羣。詩文俊雅。工音律。張于湖授臨江令。宿女貞觀。見妙常以詞調之。妙常亦以詞拒于湖。後與于湖故人潘法成私通。情洽。潘密告于湖。以計斷爲夫婦。卽俗傳玉簪記是也。

古今
女史

裴按陳妙常拒張于湖詞云清靜堂前不捲簾景
悠然閒花野草漫連天莫胡言獨坐洞房誰是伴
一爐烟閒來窗下理琴
弦小神仙見初蓉集

陳濟翁南渡遺老有鷲山溪詞云去年今日從駕游
西苑文彩壓金波看水戲魚龍曼衍寶津南殿宴坐
近天顏金盃酒君王勸頭上宮花顫六軍錦繡萬騎
寄楊箭日暮翠華歸擁鈞天笙歌一片如今關外千
里未歸人前山雨西樓晚望斷思君眼此詞天下歌
之舍人張孝祥以廷試第一移知潭州因宴客妓有
歌之者至金盃酒君王勸頭上宮花顫張之首不覺

自爲搖動者數四。坐客忍笑指目者甚多。而張不知也。
能改齋漫錄

張元幹以送胡銓及寄李綱詞坐罪。皆金縷曲也。元幹以此得名。其送銓詞云。夢繞神州路。悵秋風連營畫角。故宮禾黍。底事崑崙傾砥柱。九曲黃流亂注。聚萬落千邨狐兔。天意從來高莫問。況人情易老悲難訴。更南浦。送君去。涼生岸柳催殘暑。耿斜河。疎星澹月。斷雲微度。萬里江山知何處。回首對牀夜語。鴈不到。書成誰與。目盡青天懷今古。更兒曹恩怨相爾汝。

舉大白聽金縷

百琲明珠

周必大。有點絳脣詞贈歌者小瓊作也。秋夜乘槎客。星容到天孫渚。眼波微沁。待許牽牛渡。見了還非重。理霓裳譜。期無誤。幾年一遇。莫訝周郎顧。詞苑

左與言策名之後。入錢塘幕府。時樂籍有名姝張芸。女名濃者。色藝妙天下。與言甚眷之。如盈盈秋水。澹澹春山。及帷雲剪水滴粉搓酥之句。皆爲濃而作。當時都人有曉風殘月柳三變滴粉搓酥左與言之對。其人物風流。可以想見。俶擾之後。濃委身於立勲大。

將家易姓章。疏封大國。紹興中左因覓官赴闕下。暇日行天竺兩峯間。忽逢車輿甚盛。中一麗人褰簾顧左而顰曰。如今若把菱花照。猶恐相逢是夢中。視之乃濃也。與言醒然有悟。卽拂衣東渡爲浮屠。王仲言

裴按濃當作禮三朝北盟會編張俊妾張穠錢塘名伎也改姓章知書嘗代俊文字封榮國夫人又清波雜志嘗得一詠詞云朕眷禮勲臣旣極異姓王之貴疏恩私室并侈如夫人之榮以爾修態橫生芳性和適云云紹興權外制某人行

劉過字改之吉州大和人也性疎豪好施辛稼軒客之稼軒帥淮時改之以母病告歸囊橐蕭然是夕稼

軒與改之微服縱登倡樓適一都吏命樂飲酒不知
爲稼軒也命左右逐之二公大笑而歸卽以爲有機
密文書喚某都吏其夜不至稼軒欲籍其產而流之
言者數十皆不能解遂以五千緡爲改之母壽請言
于稼軒稼軒曰未也令倍之都吏如數增作萬緡稼
軒爲買舟于岸舉萬緡于舟中戒曰可卽行無如常
日輕用也改之作念奴嬌爲別稼軒云知音者少算
乾坤許大著身何處直待功成方見退何日可尋歸
路多景樓前垂虹亭下一枕眠秋雨虛名相誤十年

枉費辛苦。不是奏賦明光。上書北闕。無驚人之語。我自
息忙天不肖。贏得衣裾塵土。白壁堆前。黃金賣笑。
付與君爲主。尊鱸江上。浩然明日歸去。改之又號龍
洲。太和邑稱也。

江湖紀聞

劉改之過以詩名。江左放浪吳楚間。辛稼軒守京口。
登景樓。劉敝衣曳履而來。辛命賦雪。以難字爲韻。劉
吟云。功名有分平吳易。貧賤無交訪戴難。遂上武昌
作唐多令云。蘆葉滿汀洲。寒沙帶淺流。二十年重過
南樓。柳下繫船猶未穩。能幾日。又中秋。黃鶴斷磯頭。

故人曾到否。舊江山。都是新愁。欲買桂花同載酒。終不是。少年遊。劉此詞。楚中歌者競唱之。

詞苑

楊誠齋帥某處有教授狎一官伎。誠齋怒。黥伎之面。將遣之。教授酌酒與伎別。賦眼兒嬌云。鬢邊一點似飛鴉。莫把翠鈿遮。三年兩載。千擱百就。今日天涯。奈楊花又逐東風去。隨分落誰家。若還忘得。除非睡起。不照菱花。誠齋知教授能詞。卽舉伎送之。或曰帥爲孟之經。教授爲陳詵。非誠齋也。

同上

楊萬里爲監司時。巡歷至一郡。郡守宴之。官伎歌賀。

新郎詞以送酒其中有萬里雲帆何時到之句楊遽
曰萬里昨日到守慚責其伎

行都紀事

范成大行宜春道中見野塘春水可喜有懷舊隱作
謁金門詞云塘水碧。仍帶麴塵顏色。泥泥穀紋無氣
力。東風如愛惜。恰似越來溪側也。有一雙鴻鵠。只欠
柳絲千百尺。繫船春弄笛。成大出使回每思石湖故
言之悒悒如此

楊升菴

范石湖云淳熙己亥重九與客自閭門汎舟徑橫塘
宿霧一白垂垂欲雨至綠雲橋氛翳豁然晴日滿空

風景閒美無不與人意會四郊刈熟露積如繚垣田
家婦子著新衣畧有節物挂帆邇越來溪潦收淵澄
如行玻璃地上菱花雖瘦尙可采擷撿權石湖叩柴
荆坐千巖觀下菊叢中大金錢一種已爛漫穠香正
午薰入酒盃不待轟飲已有醉意其旁丹桂二兩皆
盛開多樂枝芳氣尤不可耐攜壺渡石梁登姑蘇後
臺躋攀勇往謝去巾輿筇杖石棱草滑皆若飛步山
頂正平有均堂蘚石可列坐相傳爲吳故宮閒臺別
館所在其前湖光接松陵獨見孤塔之尖少北墨點

一螺爲崑山其後西山競秀縈青叢碧與洞庭林屋
相賔大約目力踰百里具登高臨遠之勝始余使虜
是日過燕山館嘗賦水調首句云萬里漢家使後每
自和桂林云萬里漢都護成都云萬里橋邊客明年
徘徊藥市頗歎倦游不復再賦但有詩云年來厭把
三邊酒此去休哦萬里詩今年幸甚獲歸放園偕隣
曲二三子酬酢佳節于鄉山之上乃復用舊韻首句
云萬里吳船舶歸訪菊籬秋

澄懷錄

范石湖坐上客有譚劉婕好事者公與客約賦詞游

次公子明倚金縷曲先成公不復作歌亦歛手詞云
暖靄烘晴。藥鎖垂楊。籠池罩閣。萬絲千縷。池上曉光
分宿霧。日近羣芳易吐。尋竝蒂。闌邊凝竚。不信釵頭
雙鳳去。奈寶刀被妾先畱住。天一笑。萬花妬。阿嬌好
在金屋貯。甚秋風。易得蕭疎。扇鸞塵污。一自昭陽宮
閉後。牆角土花無數。況多病。情傷幽素。百花臺上空
雨露。望紅雲杳杳。知何處。天尺五。去無路。竹山漫錄

德壽宮劉妃臨安人入宮爲紅霞帔後拜貴妃又有
小劉妃者以紫霞帔轉宜春郡夫人進婕妤復封婉

儀皆有寵宮中號妃爲大劉嬪子婉儀爲小劉嬪子
婉儀入宮時年尙幼德壽賜以詞云江南柳嬾綠未
成陰攀折尙憐枝葉嫩黃鸝飛上力難禁畱取待春

淡。

周綜輦
下紀事

范致能帥蜀陸務觀在幕府主賓酬倡人爭傳誦之
陸嘗春日游摩訶池上作水龍吟云摩訶池上追游
路紅綠參差春晚韶光妍媚海棠如醉姚花欲暖挑
菜初間禁煙將近一城絲管看金鞍爭道香車飛蓋
爭先占新亭館惆悵年華暗換黯消魂雨收雲散鏡

匿掩月。釵梁折。鳳秦箏斜鴈。身在天涯。亂山孤壘。危樓飛觀。歎春來。只有楊花。和恨向東風滿。又在王忠州席上。作玉蝴蝶云。倦客平生行處。墜鞭京洛。解珮瀟湘。此夕何年。來賦宋玉高唐。繡簾開。香塵乍起。蓮步穩。銀燭分行。暗端相。燕羞鶯妒。蝶擾蜂忙。難忘芳樽頻勸。峭寒新退。玉漏猶長。幾許幽情。只愁歌罷月侵廊。欲歸時。司空笑問。微近處。丞相嗔狂。斷人腸。假饒相送。上馬何妨。

詞苑

放翁娶唐氏女伉儷相得而弗獲於姑陸出之後改

適同郡趙士程春日出游相遇於禹跡寺南之沈園
唐語其夫爲致酒肴陸悵然賦釵頭鳳詞云紅酥手
黃藤酒滿城春色官牆柳東風惡歡情薄一懷愁緒
幾年離索錯錯錯春如舊人空瘦淚痕紅浥鮫綃透
桃花落閒池閣山盟雖在錦書難託莫莫莫唐亦和
之未幾怏怏卒放翁復過沈園賦詩云落日城頭畫
角哀沈園非復舊池臺傷心橋下春波綠曾見驚鴻

照影來

耆舊
續聞

陸放翁在蜀日曾有所盼嘗賦詩云碧玉當年未破

瓜。學。成。歌。舞。入。侯。家。如。今。憔。悴。蓬。窗。底。飛。上。青。天。妬。
落。花。出。蜀。後。每。懷。舊。遊。多。見。之。題。咏。有。云。金。鞭。珠。彈。
憶。佳。遊。萬。里。橋。西。罨。畫。樓。夢。倩。晚。風。吹。不。斷。書。憑。歸。
雁。寄。無。由。鏡。中。顏。髮。今。如。此。席。上。賓。朋。好。在。否。篋。有。
吳。箋。三。百。箇。擬。將。細。字。寫。春。愁。又。云。裘。馬。清。狂。錦。水。
濱。最。繁。華。地。作。閒。人。金。壺。投。箭。銷。長。日。翠。褱。傳。杯。領。
好。春。幽。鳥。語。隨。歌。處。拍。落。花。鋪。作。舞。時。茵。悠。然。自。適。
君。知。否。身。與。浮。名。孰。是。親。仍。以。前。詩。驢。括。作。風。入。松。
三。十。年。裘。馬。錦。江。濱。酒。隱。紅。塵。黃。金。選。勝。鶯。花。海。倚。

疎狂驅使青春。吹笛魚龍盡出。題詩風月俱新。自憐
華髮滿紗巾。猶是官身。鳳樓會記當年語。問浮名何
是身親。欲寫吳箋說與。這回真箇閒人。

詞苑
叢談

姜堯章揚州慢自敘云。淳熙丙申至日。過維揚。夜雪
初霽。薺麥彌望。入其城。則四顧蕭條。寒水自碧。暮色
漸起。戍角悲吟。予懷愴然。感慨因自度此曲。云淮左
名都。竹西佳處。解鞍少駐初程。過春風十里。盡薺麥
青青。自吳馬窺江去後。廢池喬木。猶厭言兵。漸黃昏
清角。吹寒都在空城。杜郎俊賞。算如今重到。須驚縱。

荳蔻詞工。青樓夢好。難賦淡情。二十四橋。仍在波心。
蕩。冷月無聲。念橋邊紅藥。年年知爲誰生。

白石道人歌曲

辛亥之冬。予載雪詣石湖。旣止。月授簡索句。且徵新
聲。作此兩曲。石湖把玩不已。使工妓習之。音節諧婉。
乃命之曰。暗香。疎影。其暗香詞云。舊時月色。算幾番
照我。梅邊吹笛。喚起玉人。不管清寒與攀摘。何遜而
今漸老。都忘却。春風詞筆。但怪得。竹外疎花。香冷入
瑤席。江國正寂寂。嘆寄與路遙。夜雪初積。翠尊易泣。
紅萼無言耿相憶。長記曾攜手處。千樹壓西湖寒碧。

又片片吹盡也。幾時見得。其疎影詞云。苔枝綴玉。有翠禽小小。枝上同宿。客裏相逢。籬角黃昏。無言自倚修竹。昭君不慣胡沙遠。但暗憶江南江北。想珮環月夜歸來。化作此花幽獨。猶記淡宮舊事。那人正睡裏。飛近蛾絲。莫似春風。不管盈盈。早與安排金屋。還教一片隨波去。又却怨、玉龍哀曲。等恁時、重覓幽香。已

入小窗橫幅。

同上

小紅范成大青衣也有色。藝成大請老姜夔詣之一日。授簡徵新聲。夔製暗香疎影兩曲。成大使二伎歌。

之音節清婉成大尋以小紅贈之其夕大雪過垂虹
賦詩曰自喜新詞韻最嬌小紅低唱我吹簫曲終過
盡松陵路回首煙波十里橋夔喜自度曲吹洞簫小
紅輒歌而和之夔卒于蘇州范挽詩曰所幸小紅方
嫁了不然啼損馬塍花宋時花藥出東西馬塍皆名
人葬處夔葬此故云

研北
雜志

紹熙辛亥除夕予別石湖歸吳興雪後夜過垂虹嘗
賦詩云笠澤茫茫雁影微玉峯重疊護雲衣長橋寂
寞春寒夜只有詩人一舸歸後五年冬復與俞商卿

張平甫鉅朴翁自封禺同載詣梁溪道經吳松山寒
天迥雪浪四合中夕相呼步垂虹星斗下垂錯雜漁
火朔吹凜凜卮酒不能支朴翁以衾自纏猶相與行
吟因賦慶春宮一闕云雙槳葦波一簑松雨暮愁漸
滿空濶呼我盟鷗翩翩欲下背人還過木末那回歸
去蕩雲雪孤舟夜發傷心重見依約睂山黛痕低壓
采香涇裏春寒老子婆婆自歌誰答垂虹西望飄然
引去此興生平難遏酒醒波遠政凝想明璫素韞如
今安在唯有闌干伴人一霎

遊懷
錄

予與張平甫自南昌同游西山玉隆宮止宿而返蓋
乙卯三月十四日也是日卽平甫初度因買酒茅舍
竝坐古楓下古楓旌陽在時物也旌陽嘗以草屨懸
其上土人以屨爲屨因名挂屨橋蒼山四圍平野盡
綠隔澗野花紅白照影可喜使人採擷以藤紮纏著
楓上少焉月出大黃金盆逸興橫生遂成痛飲午夜
乃寢明年平甫初度欲治舟往封禺松竹間念此游
之不可再也歌以壽之曾共君侯歷聘來去年今日
踏莓苔旌陽宅裏疎疎磬挂屨橋前草草盃呼旨酒

摘青梅。今年官事莫徘徊。移家徑入藍田縣。急急船

頭打鼓催。

白石道人歌曲

予女須家河之山陽左白湖右雲夢春水方生浸數
十里冬寒沙露衰草入雲丙午之秋予與安錫或蕩
舟採菱或舉火置兔或觀魚簞下山行墅吟自適其
適憑虛悵望因賦浣溪紗一闕云著酒行行滿袂風。
草枯霜鶻落晴空。銷魂都在夕陽中。恨入四弦人欲
老。夢尋千驛意難通。當時何似莫怱怱。
同上

淳熙丙子武昌安遠樓成與劉去非諸友落之度曲

見志予去武昌十年故人有泊舟鸚鵡洲者聞小姬
歌此詞問之頗能道其事還吳爲予言之興懷昔游
且傷今之離索也詞云月冷龍沙塵清虎落今年漢
酺初賜新翻胡部曲聽氍毹元戎歌吹層樓高峙看
檻曲縈紅簷牙飛翠人姝麗粉香吹下夜寒風細此
地。宐。有。詞。仙。擁。素。雲。黃。鶴。與。君。游。戲。玉。梯。凝。望。久。歎。
芳。草。萋。萋。千。里。天。涯。情。味。仗。酒。散。清。愁。花。銷。英。氣。晚
來還捲一簾秋霽。同

予客武陵湖北憲治在焉古城野水喬木參天予與

二三友日蕩舟其間。薄荷花而飲。意象幽閒。不類人
境。秋水且涸。荷葉出地尋丈。因列坐其下。上不見日。
清風徐來。綠雲白動。間於疎處窺見游人。畫船亦一
樂也。揭來吳興。數得相羊荷花中。又夜汎西湖。光景
奇絕。故以此句寫之。闌紅一舸。記來時。嘗與鴛鴦爲
侶。三十六陂人未識。水佩風裳無數。翠葉招涼。玉容
銷酒。更灑菰蒲雨。嫣然搖動。冷香飛上詩句。口暮青
蓋亭亭。情人不見。爭忍凌波去。只恐舞衣寒易落。愁
入西風南浦。高柳垂陰。老魚吹浪。留我花間住。田田

多少。幾回沙際歸路。同上。

堯章嘗寓吳興。張仲遠家。仲遠屢出外。其室人知書。賓客通問。必先窺來札。性頗妒。堯章戲作百字嬌詞。以遺仲遠。云：看垂楊迷苑。杜若吹沙。愁損未歸眼。信馬青樓去。重簾下。娉婷人妙。飛燕翠尊共歛。聽豔歌。郎意先感。便攜手。月地雲堦裏。愛良夜微暖。竟爲所見。仲遠歸。莫能辨。則受其指爪損面。至不能出外云。

耆舊續聞

張樞斗南踐馭朱華爲宣詞。令閭門簿書詳知朝儀。

典故其姑縉雲夫人承恩穆陵因得出入九禁備見
一時宮中燕幸之事嘗賦宮詞七十首盡載當時盛
際非其他想像而爲者其一云晚涼開燕近中秋香
染金風倚桂樓花月新篇初唱徹內人傳旨索歌頭

原注穆陵製花月篇

同上

昔與又新萍聚行都一日出遊湖上約各倚綺羅香
慢和周公謹十景樂府又新卽席上立成十解予研
思苦索未克就一調而罷又新餘興未已復成柳枝
詞八絕余益斂手歎服事往已二十餘霜矣今覽稿

中無一存者。逸與刪與音書寥闊。皆不可得而知也。
子尚記其桺詞之一云。搖曳煙條馬首迎。綠陰濃處。
護鶯聲。離人不到蘇隄畔。玉笛何須譜渭城。

王奕

岳州徐君寶妻被掠來杭。居韓蘄王府。主者數欲犯
之。因告曰。侯妾祭先夫。然後爲君婦。主者喜諾。乃焚
香再拜。題詞一闕于壁上。投池中。死。其詞云。漢上繁
華。江南人物。尙遺宣政風流。綠窗朱戶。十里爛銀鈎。
一旦刀兵齊舉。旌旗擁百萬貔貅。長驅入。歌樓舞榭。
風捲落花愁。清平三百載。典章文物。掃地都休。幸此

身未北。猶客南州。破鏡徐郎何在。空惆悵。相見無由。
從今後。斷魂千里。夜夜兵陽樓。

穀耕錄

金人犯闕。武陽令蔣興祖死之。其女被擄至雄州驛。
題減字木蘭花於壁云。朝雲橫度。輾輾車聲如水去。
白草黃沙。月照孤邨三兩家。飛鴻過也。百結愁腸無
盡夜。漸近龍山。回首鄉關歸去難。蔣乃靖康間浙西

人

梅磧詩話

陸敦禮侍兒名美奴。善口占小詞。每乞韻於座客。頃
刻成章。敦禮令掌文翰。其卜算子詞云。送我出東門。

乍別長安道。兩岸垂楊鎖暮煙。正是秋光老。一曲古
陽關。莫惜金尊倒。君向瀟湘我向秦。魚雁何時到。如
夢令云。日暮馬嘶人去。船逐清波東注。後夜最高樓。
還見思量人否。無緒無緒。生怕黃昏疎雨。茗溪
漁隱

南渡初。南班宗子寓居會稽。爲近屬士園亭。甲于浙
東。一時坐客皆騷人墨士。陸子逸嘗與焉。士有侍姬
盼盼者。色藝殊絕。公每屬意焉。一日宴客。偶睡不與
捧觴之側。陸因問之士。卽呼至。其枕痕猶在。臉公爲
賦瑞鶴仙。有臉霞紅印枕之句。一時盛傳。逮今爲雅

唱後盼盼亦歸陸氏。

耆舊續聞

西湖之盛於唐至宋南渡建都則游人士女畫舫笙歌日費千金時人目爲銷金窩相傳到今上饒熊進德竹枝詞云銷金窩邊碼瑙坡。爭似儂家春最多。蝴蝶滿園飛不去。好花紅到剪春羅。詞旨幽婉可玩。予昨游寶叔山天然閣上諸作惟蘇吳杜庠一聯淡愜子意其詞云分明似鏡憑誰鑄。多少黃金向此銷。與

銷金窩同意。

禪寄筆談

詞苑萃編卷之十四

南匯馮金伯治堂輯錄

句容裴 暢芝亭參訂

紀事 五

朱晦庵爲倉使時某郡太守遭摭撫幾爲按治憂惶
百端未幾晦庵易節他路有寄居官署者因召守飲
出寵姬歌大聖樂云千朶奇峯半軒微雨曉來初過
漸燕子引教雛飛。蒼苔暗薰芳草池面涼多淺斟瓊
卮浮綠蟻。展湘簾雙紋生細波。輕紈舉動團圓素月。

仙桂婆娑。臨風對月恣樂。便好把千金邀豔娥。幸太平無事。擊壤鼓腹。攜酒高歌。富貴安居。功名天賦。爭奈皆由時命呵。休眉鎖。問朱顏去了。還更來麼。太守聽朱顏去了。句。不覺起舞。軒渠後錄

按大聖樂詞乃康與之所作

天台營伎嚴蕊有才名。唐與正爲守。嘗命賦紅白桃花蕊。作憶仙姿一闋。云道是梨花不是。道是杏花不是。白白與紅紅。別是東風情味。曾記曾記。人在武陵微醉。與正賞之。雙練後朱晦庵以節使行部至台。欲

撫與正之罪。指其嘗與蕊濫。蕊雖備極箠楚。而一語
不及唐獄吏好言誘之。蕊曰。身爲賤伎。縱與太守濫。
亦不至死罪。然是非真僞。豈可妄言。以汚士大夫也。
繫獄兩月。聲價愈騰。至徹阜陵之聽。未幾朱公改除。
而岳霖爲憲。憐其無辜。猝命作詞。蕊口占卜算子云。
不是愛風塵。似被前緣誤。花落花開自有時。總賴東
風主。去也終須去。住也如何住。若得山花插滿頭。莫
問奴歸處。卽日判令從良。

詞苑

趙汝愚題鼓山寺云。幾年奔走厭塵埃。此日登臨亦

快哉江月不隨流水去。天風常送海濤來。朱晦庵摘
其中天風海濤四字題扁。人莫知爲趙公詩也。嚴次
山有水龍吟詞題壁云。飈車飛上蓬萊。不須更跨琴
高鯉。蒼然長嘯。天風瀕洞。雲濤無際。我欲乘桴。從茲
浮海。約任公子。辦虹竿千丈。犗鉤五十。親點對連鰲
餌。誰榜佳名空翠。紫陽仙去騎箕尾。銀鉤鐵畫。龍拏
鳳翥。畱人間世。更憶東山登臨。一曲暗霑襟淚。到而
今幸有高亭遺愛。寓甘棠意。此詞前段言江山景。後
段紫陽仙去。指朱文公。東山甘棠。指趙公也。趙詩朱

字嚴詞可謂三絕。

詞品

趙汝愚有題豐樂樓柳梢青詞云水月光中烟霞影裏湧出樓臺。空外笙歌。人間笑語。身在蓬萊。天香暗逐風回。正十里荷花盡開。買箇輕舟。山南遊徧。山北歸來。汝愚謫後朱晦庵歎宗臣去國。註楚辭以哀之。

宋名家

詞評

謝希孟陸象山門人也。少豪俊。與伎陸氏狎。象山屢責之。希孟但敬謝而已。他日復爲伎造鴛鴦樓。象山又以爲言。希孟謝曰。非特建樓。且爲作記。象山喜其

文不覺曰樓記云何。卽占首句云自遜抗機雲之死。而天地英靈之氣。不鍾於男子。而鍾於婦人。象山默然知悔已也。一日在伎所。恍然有悟。不告而行。伎追送江潯。悲戀涕泣。希孟不顧。取領巾書一詞與之。云雙槳浪花平。夾岸青山鎖。你自歸家我自歸。說著如何過。我斷不思量。你莫思量我。將你從前與我心。付與他人可。其詞勇決真象山門下之利根也。古今詞話汪彥章爲張邦昌雪罪表云孔子從佛肸之召本爲尊周紀信乘漢王之車蓋將誑楚其顛倒是非助奸

佑逆不足言也。乃其詞曰：佳嘗見畫舫有映簾而觀者，僅露其額。賦醉落魄，云：小舟簾隙，佳人半露梅妝額。綠雲低映花如刻，却似秋宵一綫銀蟾白。髻兒梢染香紅，撚鈿蟬隱隱，搖金碧。春山秋水渾無迹，不露牆頭些子真消息。

詞苑

吳毅甫嘉定丁丑狀元，爲賈似道所陷，南遷嶺表。有履齊詩餘行世，其送李御帶祺一詞，報國無門空自怨。濟時有策從誰吐，亦自道也。李祺號竹湖，亦當時名士。所著有春秋王霸列國分紀，余得之市肆，故書

中乃爲傳之

詞品

朔齋劉振孫知宛陵毅夫丞相方閒居劉日陪午橋之游後以名還吳餞之郊外劉賦摸魚兒詞爲別末云怕綠野堂邊。劉郎去後。誰伴老裴度。毅夫爲之揮淚。繼遣一价追和此詞。并侑以小奩。啟之精金百星也。前輩憐才賞音如此。齊東野語

徐參政清叟微時贈建寧伎唐玉詩云上國新行巧樣花。一枝聊插鬢邊斜。嬌羞未肯從郎意。故把芳容故故遮。吳履齋丞相和以賀新郎詞云可意人如玉。

小簾櫳。輕勻淡抹。道家妝束。長恨春歸無尋處。全在
波明黛綠。看冶葉倡條。渾俗。比似江海清有韻。更臨
風對月。斜依竹。看不足。詠不足。曲屏半掩。春山簇。正
輕寒。夜淡花睡。半欹殘燭。縹紗九霞光裏夢。香在衣
裳。脂馥。又只恐。銅壺聲促。試問送人歸去後。對一奩
花影。垂金粟。腸易斷。恨難續。豹隱
紀談

王邁丁丑第四人及第。劉後邨賀啟云。聲名早著。不
數黃香之無雙。科目小低。猶壓杜牧之第五。又贈之
詞云。天壤王郎。數人物。方今第一。談笑裏。風霆驚坐。

雲烟生筆。落落元龍湖海氣。琅琅董相天人策。其重之如此。詞苑

宋駙馬楊震有十姬名粉兒者尤勝一日招詹天游宴出諸姬佐觴天游屬意粉兒口占浣溪紗詞云淡
淡青山兩點春。嬌羞一點口兒櫻。一梭兒玉一縐雲。
白藕香中見西子。玉梅花下遇昭君。不曾真箇也消魂。
楊遂以粉兒贈之曰請天游真箇消魂也。同上
季蕃貫開封曾祖昇祖可父顗武爵季蕃少受祖澤
調監當不樂棄去始婚於婺後去婺游畱蘇杭最久

一榻之外無長物。躬糲而食。書無乞米之帖。文無逐
貧之賦。終其身如此。名重江浙。公卿間聞。花翁至。爭
倒屣所談。非山水風月。一不挂口。長身縑袍。意度疎
曠。見者疑爲俠客異人。其倚聲度曲。公瑾之妙。散髮
橫篴。野王之逸。奮袖起舞。越石之壯也。劉後邨孫
花翁墓誌
寶慶初。史彌遠廢立之際。錢唐書肆陳起宗之能詩
凡江湖詩人俱與之善。刊江湖集以售。劉潛夫南岳
葉與焉。宗之賦詩有云。秋雨梧桐皇子府。春風楊柳
相公橋。本改劉屏山句也。或嫁秋雨春風之句爲敖

器之所作言者併梅詩論列。劈江湖集版。二人皆坐
罪。初彌遠議下大理逮治。鄭丞相清之在瑣闥。白彌
遠中輟而宗之坐流配。於是詔禁士大夫作詩。如孫
花翁之徒。改業爲長短句。紹定癸巳。彌遠死。詩禁解。
潛夫爲訪梅絕句云。夢得因桃却左遷。長卿爲柳忤
當權。幸然不識桃并李也。被梅花累十年。此可備梅
花大公案也。

瀛奎
律髓

劉潛夫在維揚。陳師文參議家見舞姬妙絕。賦清平
樂詞云。宮腰束素。只怕能輕舉。好築避風臺。護取莫

遣驚魂飛去一團香味溫柔笑顰俱有風流貪與蕭郎眉語不知舞錯伊州詞苑

豐樂樓在湧金門外舊爲眾樂亭又改聳翠樓政和中改今名淳祐間趙京尹與憲重建宏麗爲湖山冠又贊月池立秋千校門植花木構數亭春時游人繁盛舊爲酒肆以學館致爭但爲朝紳同年會拜鄉會之地吳夢窗嘗大書所作鶯啼序於壁一時爲人傳

誦武林舊事

紹興郡治在臥龍山上蓬萊閣在郡設廳後取元微

之我是玉皇香案吏。謫居猶得近蓬萊句也。名公多
題詠。沈紳詩云。玉鉉相公頒瑞地。金貂仙子挂冠鄉。
錢公輔云。一級一級烟雲生。四面四面屏幃迎。秦觀
詩云。路隔蓬萊三兩水。門臨南鎮一千峯。後有周公
謹密題一萼紅詞云。步溪幽。正雲黃天淡。雪意未全
休。鑑曲寒沙。茂林煙草。俛仰古今悠悠。歲華晚。漂零
漸遠。誰念我。同載五湖舟。磴古松。斜厓陰苔。老一片
清愁。回首天涯歸夢。幾魂飛西浦。淚灑東州。故國山
川。故園心眼。還似王粲登樓。最負他。秦鬟妝鏡。好江

山何事此時游。爲喚狂吟老監。共賦消憂。

輿地紀勝

都城自過收鐙後。貴游巨室。爭先出郊。謂之探春。水面畫楫。櫛比如鱗。無行舟之路。游之次第。先南而後北。至午則盡入西泠橋裏湖。其外幾無一舸矣。弁陽老人有詞云。看畫船盡入西泠間。卻半湖春色。蓋紀實也。

武林舊事

按馬臻霞外集。春日游西湖詩。畫船過午入西泠。人擁孤山陌上塵。應被弁陽摹寫盡。晚來閒卻半湖春。

孤山路四聖延祥觀有韋太后沈香四聖像小蓬萊

閣瀛嶼堂金沙井六一泉花寒水潔氣象幽古三朝
臨幸周密有詠延祥觀拒霜西江月詞云綠綺紫纓
步障紅鸞綵鳳仙城誰將三十六陂春換得雨隄秋
錦眼纈醉迷朱碧名花俊賞丹青斜陽展盡趙昌屏
羞死舞鸞妝鏡

同上

張叔夏過錢塘西湖慶樂園賦高陽臺詞自序云慶
樂園韓平原之南園也戊寅歲過之有碑石在荊棘
中。惟存古桂百餘。故末句有猶今視昔之感。其詞曰
古木迷鴉虛堂起燕歡游轉眼驚心南圃東窗酸風

埽盡芳塵。鬢貂飛入平原草。最可憐。渾是秋陰夜沈。
沈。不信歸魂。不到花深。吹簫踏葉幽尋去。任船依斷
石。袖裏寒雲。老桂懸香。珊瑚擊碎無聲。故園已是愁
如許。撫殘碑。又却傷今。更關情。秋水人家。斜照西林。
復齋漫錄

予載書往來山陰道中。每以事奪。不能盡興。戊子冬
晚。與徐平野王中仙曳舟溪上。天空水寒。古意蕭颯。
中仙有詞雅麗。平野作晉雪圖。亦清逸可觀。余述此
詞。蓋白石念奴嬌鬲指聲也。行行且止。把乾坤收入。

蓬窗淡裏星散白鷗三四點數筆橫塘秋意岸嘴衝
泥籬根受葉野逕通邨市疎風迎面濕衣原是空翠
堪歎敲雪門荒爭棋墅冷苦竹鳴山鬼維使如今猶
有晉無復清游如此落日沙黃遠天雲濤弄影蘆花
外幾時歸去翦取一半煙水

山中白雲詞

中吳車氏號秀卿樂部中之翹楚者歌美成曲得其
音旨余每聽輒愛歎不能已因賦意難忘一闋以贈
風月吳娃柳陰中認得第二香車春波妝減豔波轉
影流花鶯語滑透紋紗有低唱人誇怕誤却周郎醉

眼倚扇。佯遮底。須拍碎紅牙。聽曲終雅奏。可是堪嗟。
無人知此意。明月又誰家。塵滾滾。老年華。付情與琵琶。
更歎我黃蘆苦竹。萬里天涯。

同上

張叔夏國香詞自序云。沈梅嬌。杭妓也。忽於京師見之。把酒相勞苦。猶能歌周清真意。難忘臺城路二曲。因屬余紀其事。詞成。以素羅帨書之。鶯柳煙堤。記未吟青子。曾比紅兒。嬌蕊弄香微透。鬟翠雙垂。不道畱仙不住。便無夢。吹到南枝。相看兩流落。掩面凝羞。怕說當時。淒涼歌楚調。嬾餘音。不放一朶雲飛。丁香枝。

言外意
上幾度款語淡期。拜了花梢淡月。最難忘、弄影褰衣。
無端動人處。過了黃昏。猶道休歸。能改齋漫錄

姑蘇汾湖居士陸行直輔之。有家伎名卿卿。以才色見稱。友人張叔夏爲作古清平樂以贈之。云候蟲淒斷人語。西風岸月落沙平。流水漫驚見蘆花來雁。可憐瘦損蘭成。多情應爲卿卿。只有一枝梧葉。不知多少秋聲。後二十一載。行直以翰林典籍致政歸。則叔夏卿卿皆下世矣。行直作碧梧蒼石圖并書張詞於卷端。且和之云。楚天雲斷。人隔瀟湘岸。往事悠悠江

水漫。怕聽樓前新雁。深閨舊夢還成。夢中猶記憐卿。
依約相思碎語。夜涼梧葉聲。

珊瑚網

大江富池縣有甘寧將軍廟。殿宇雄偉。行舟過之者。
必具牲醴祇謁。李子永嘗自西下舟。次散花洲。有神
鴨飛立牆竿久之。東去。卽遇便風。晡時抵岸。散步青
蛇激箭而來。至舟尾不見。是夕艤泊。明日賽神。其前
大樓七間。尤壯偉。郡守周少隱采東坡祠語。扁爲卷
雪子。永作詩曰。卷雪樓前萬里江。亂峯卓立森旗槍。
上有甘公古祠宇。節制洪流掌風雨。甘公一去踰千

年。至今忠氣猶凜然。我來再拜攬陳迹。斜陽白鳥橫
蒼烟。初題梁間時。本云英威凜然。如有人掣其肘。乃
改爲忠氣。又賦望月水調歌頭云。危樓雲雨上。其下
水扶天。羣山四合。飛動寒翠。落簷前。盡是秋清。闌檻
一笑波翻濤怒。雪陣卷蒼煙。炎暑去無跡。清駛久翩
翩。夜將闌。人欲靜。月初圓。素娥弄影。光射空際。綠嬋
娟。不用濯纓垂釣。喚取龍公仙駕。耕比萬頃田。橫笛
望中起。吾意已超然。及旦移舟。神鴉青蛇。送至長風
沙而止。
夷堅志

按李子永名石號蘭澤
廬陵人嘗爲深水令

度宗賜賈似道第於西湖上似道扁亭名曰半閒以
停雲水道人每治事罷則入亭中打坐有佞之者上
唐多令詞大稱似道意義者謂其時乃聖哲馳驚而
不足之秋也曾謂似道而以半閒自處乎詞云天上
謫仙班青牛初度關幻出蓬萊新院宇花外竹竹邊
山軒冕儻來看人生閒最難算真閒不到人間一半
神仙先占取畱一半與公閒

古杭
雜記

似道當國行公田關子法民間苦之錢塘葉太白李

上書力詆似道怒黥流嶺南及赦還而似道有漳州之謫遇諸塗太白贈之詞曰君來路我歸路來來去去何時住公田關子竟何如國事當時誰與誤雷州戶崖州戶人生會有相逢處客中頗恨乏蒸羊聊贈一篇長短句

西湖志餘

賈秋壑既安置循州有無名氏題其壁云去年秋今年秋湖上人家樂復憂西湖依舊流吳循州賈循州十五年間一轉頭人生放下休吳謂履齋也初吳履齋循州安置賈除劉宗中知循州陰使害之後賈亦

循州安置。經漳州木棉菴。爲鄭虎臣鎚死。時賈客趙
介如守漳州。致祭辭云。嗚呼。履齋死蜀。死于宗中。先
生死閩。死于虎臣。祇十八字。而哀激之恫。無在不復
之意。悉寓其中。可與是詞並垂。同上

張淑芳西湖樵家女。理宗選妃。日賈似道匿爲已妾。
卽德祐太學生百字令中所指新塘楊柳。也有無名
氏題壁云。山上樓臺湖上船。平章醉後。嬾朝天。羽書
莫報樊城急。新得娥眉正少年。淑芳亦知必敗。營別
業以避跡焉。木棉之後。自度爲尼。罕有知者。詞數闕

今錄其浣溪紗云散步山前春草香。朱闌綠水遶吟
廊。花枝驚墮繡衣裳。或定或搖江上柳。爲鸞爲鳳月
中篁。爲誰掩抑鎖雲窗。更漏子云墨痕香。紅蠟淚點
點。愁人離思。桐葉落。蓼花殘。雁聲天外寒。五雲嶺。九
溪塢。待到秋來更苦。風淅淅。水淙淙。不教蓬徑通。至
今五雲山下九溪塢。尙有尼菴。同上

岳倦翁珂忠武王孫敷文閣待制霖子管内勸農使
知嘉興歷官戶部侍郎淮東總領兼制置使有登多
景樓祝英臺近云甕城高盤徑近十里笋與穩欲駕

還休風雨苦無準。古來多少英雄。平沙遺恨。又總被、
長江流盡。倩誰問。因甚衣帶中分。吾家自嗟。吟落日、
潮頭漫寫。屬鏤憤。斷腸煙樹揚州。興亡休說。正愁盡、
河山雙鬢。

京口三
山志

尹梅津未第時。薄游茗雪籍中。適有所盼。後十年。問
訊舊游。則久爲宗子所據。且育子而猶挂名籍中。於
是假之郡將。久而始來。顏色憔悴。不足膏沐。相對若
不勝情。梅津爲賦。唐多令云。蘋末轉清商。溪聲供夕
涼。緩傳盃。催與紅妝。慢綰烏雲新浴罷。拂拂地。水沈

香歌短舊情長重來驚鬢霜。恨綠陰青子成雙。說著
前歡。佯不保。颺蓮子。打鴛鴦。

齊東野語

牟端明園本郡志南園後歸李寶謨其後又歸牟存
齋園中有碩果軒元祐學堂芳菲二亭萬鶴亭桴舫
齋岷峨一畝宮前枕大溪曰南漪小隱周嘯齋晉有
訪南漪釣隱點絳脣詞云午夢初回捲簾盡放春愁
去。晝長無侶。自對黃鸝語。絮影蘋香春在無人處。移
舟去。未成新句。一研梨花雨。

癸辛雜志

張武子嘗自哦其詩曰客向愁中都老盡。祇留平楚

件銷凝。又哦其詞云。昨日豆花籬下過。忽然迎面好
風吹。獨自立多時。其大約可見矣。閉門讀書。室中無
一物。性嗜詩。未嘗強作。或終歲無一語。故所作必絕
人。妻孥至不免饑寒。或謂君不爲歲晚計。君曰。水禽
有信。天公者。食魚而不能捕。凝立沙上。它禽過。偶墜
魚於前。乃拾之。然未聞有餓死者。其夷澹類此。樓鑰
攻媿

集

江陵仲宣樓名。昉於祥符。復於紹興。淳祐十年。賈公
似道爲制置使。重新是樓。夏六月。易鎮全淮。覃懷李

某繼之如前畫半期告成。蜡月三十有五。日爰集賓僚。置酒而落之。又有點絳脣詞。餞陳次賈云。嬾上危樓。楚江一望。天無際。漫游萍寄。莫挽東流水。一片秋光。直到山陰里。人還記。戍邊歸未。更憶鱸魚美。李曾伯可

齋雜錄

裴按陳次賈名策。上虞人。以功授武階。有仲宣樓賦。摸魚兒詞。想卽在是樓落成之日也。詞見周草窗絕妙好詞。

延平樂籍中有能墨竹草聖者。潘廷堅爲賦。念奴嬌。美其書畫。末句玉帶懸魚。黃金鑄印。侯封萬戶。待從

頭繳納君王。覓取愛腳歸去。余罷袁守。歸塗赴郡集。

席間借觀焉。

後山詩話

陳敬叟以莊號月溪。有水龍吟詞。晚來江闊潮平。越船吳榜。催人去。稽山滴翠。胥濤濺恨。一襟離緒。訪柳章臺。問桃仙圃。物華如故。向秋娘渡口。泰娘橋畔。依稀是相逢處。窈窕青門紫曲。舊羅衣。新番金縷。仙音恍記。輕擺慢撚。哀弦危柱。金屋難成。阿嬌已遠。不堪春暮。聽一聲杜宇。紅殷絲老。雨花風絮。自註記錢塘之恨。蓋謝太后隨元人北去事也。時太后年七十餘。

故有金屋阿嬌不堪春暮之句。惜其不能死難。有媿於符登之毛氏。寶建德之曹氏多矣。

堅瓠集

蘇雪坡贈楊直夫詞云。允文事業從容了。要岷峨人物。後先相照。見說君王曾有問。似此人才多少。泥蜀珍先已登廊廟。但側耳聽新詔。按高宗嘗問馬騏曰。蜀中人才如虞文允者有幾。馬騏對曰。未試焉知。允文亦試而後知也。蘇與楊馬皆蜀人。楊在眉山爲甲族直夫之妹。通經學。比於曹大家。嫁虞氏。生虞集。爲鉅儒。其學無師。傳於母氏也。此事蜀人亦罕知。故著

之。輟耕錄

戚里鄭君光錫語余往歲赴張功甫南湖園春燕置酒聽鶯亭亭外垂柳數十株柔荑初綠酒半出家伎十餘輩悉衣鵝黃宮錦半臂竝歌唐人柳枝詞作貼地舞歌竟又易十餘輩悉衣淺碧蜀錦裙手執柳枝唱名流詠柳樂府送客諸伎籠鐙者以百計。薛夢桂蘇壁瑣言

張功甫鎡善填詞嘗卽席作賀新郎送陳退翁分教衡湘云桂隱傳盃處有風流千巖勝韻太邱遺譜玉

季金昆。霄漢侶。平步鸞坡。揮麈。其便駕。風飄烟渚。雲
動精神衡岳。去向君山帝野。鏘韶濩。蘭藝晚。弔湘楚。
南湖老矣。無襟度。但尊前。踴躍醉飲。帽花顛仆。只恐
清時專文教。猶貸陰山狂虜。臥玉帳。貔貅鉦鼓。忠烈
前勳。賁萬恨。望神都。魏闕奔狐兔。呼翠袖。爲君舞。同上
李萊老彭老兄弟。皆與草窗善。萊老題其詞卷有句
云。白髮潘郎吟欲醉。綠暗蘼蕪千里。彭老懷嘯翁詞
有句云。相對夜何其。泛剡清愁。買花芳事。一卷新詩。

予友臨安何應龍子翔詩多風懷之作二韻小詩尤
佳酷似溫岐余最愛其湖亭席上贈別郭雙蓮絕句
云樓上佳人唱渭城樓前楊柳綰離情一聲未是難
聽處最是難聽第四聲自注雙蓮能歌周美成蘭陵
王曲并能擲笛倚之衙前和顧前鈞容直一輩人皆
從渠授技周詞瓦子中以方渭城三疊旗亭送別竝
歌是詞

李萊老二
隱叢說

楊舜舉觀我金華人栗里翁本然之子隱居不仕父
子一門自爲師友栗里善說經觀我精攷史均出王

淡寧尙書之門他文辭亦工觀我於填詞尤妙其錢
唐有感浣沙谿云殘照西風一片愁疎楊畫出六橋
秋游人不上十三樓有淚金僊還泣漢無心玉馬已
朝周平湖寂寂水空流玉馬朝周蓋譏趙氏宗室入
仕本朝者姚雲文江
邨賸語

有倚八聲甘州賦湖上柳者末云想當年龍舟鳳舸
樂宸游搖曳錦帆斜傷心是御香染處樹樹棲鴉故
國之感寫得悽惋如許湯仲友云其家西邨恢兵後
所作皆山樓
餘話

吳江三高祠前有釣雪亭蓋漁人之窟宅也盧申之
題賀新郎一闕云挽住風前柳問鴟夷當日扁舟近
曾來否月落潮生無限事零亂茶煙未久漫畱得蓴
鱸依舊可是功名從來誤撫荒祠誰繼風流後千古
恨一搔首江涵鴈影梅花瘦四無塵雪飛風起夜窗
如畫萬里乾坤清絕處付與漁翁釣叟又恰是題詩
時候猛拍闌干呼鷗鷺道他年我亦垂綸手飛過我

共尊酒

蘆蒲
筆記

周晉有清平樂詞云圖書一室香暖垂簾幕花滿翠

壺薰研席睡覺滿窗晴日。手寒不了殘碁。篝香細勘
唐碑。無酒無詩情緒。欲梅欲雪天時。郭界手書此詞
跋云大德十一年歲丁未十月初十日客寓燕山奔
走暮歸黃塵滿面挑鐙讀此詞一過想像江南如夢
中也。珊瑚網

文信國被執北行次信安館人供帳甚盛信國達旦
不寐題詞於壁調寄南樓令云雨過水明霞潮迴岸
帶沙。葉聲寒飛透窗紗。懊恨西風吹世換。又吹我落
天涯。寂寞古豪華。烏衣又日斜。說興亡燕入誰家。只

有南來無數雁。和明月宿蘆花。

耆舊續聞

易彥祥寧宗朝狀元初以優校爲前廊久不歸其妻作一翦梅詞寄之云染淚修書寄彥祥。貪却前廊。忘卻回廊。功名成就不還鄉。石做心腸。鐵做心腸。紅日三竿未理妝。虛度韶光。瘦損容光。相思何日得成雙。

羞對鴛鴦。嬾繡鴛鴦。

古杭雜記

連可久江湖得道之士也十二歲其父攜見熊曲肱適有漁父過前令賦漁父詞連應聲作清平樂云陣鴻驚處。一網沉江渚。落葉亂飛和細雨。撥棹不如歸。

去蘆花輕汎微瀾。蓬窗獨自清閒。一覺遊仙好夢。任他竹冷松寒。曲肱贈以詩。且謂此子富貴中畱不住。後果爲羽衣多往來西山。

詞苑

白玉蟾瓊州人有海璫子集。自言世間有字之書。無不目過。足跡半天下。常爲朱晦菴題像賦三臺令詞。其自題亦云。千古蓬頭跣足。一生服氣餐霞。笑指武

夷山下。白雲深處吾家。後於鶴林羽化。

湧幢小品

白玉蟾居武夷山中嘉定間。詔徵赴闕。嘗過武昌賦。醉江月懷古詞云。漢江北瀉。下長淮。洗盡胷中今古。

樓櫓橫波征鴈遠。誰見魚龍夜舞。鸚鵡洲雲。鳳凰山
月。付與沙頭鷺。功名何處。年年惟見春絮。非不豪似
周瑜。壯如黃祖。亦逐秋風度。野草閒花無限恨。渺在
西山南浦。黃鶴樓人。赤烏年事。江漢亭前路。浮萍無
據。水天幾度朝暮。能改齋漫錄

天台伎嚴幼芳嘗七夕宴坐有謝元卿者豪士也固
命之賦詞以已姓爲韻酒方行而成鵲橋仙云碧梧
初出。桂花才吐。池上水花微謝。穿針人在合歡樓。正
月露玉盤高瀉。蛛忙鵲嬾。耕慵織倦。空做古今佳話。

人。閒。剛。道。隔。年。期。想。天。上。方。纔。隔。夜。元。卿。爲。之。心。醉。

畱其家半載。傾囊贈之而歸。

詞苑

宋有陳襲善者。遊錢塘。與營伎周子文狎。挾之遍歷湖山。後襲善去。爲河朔掾。宿奉高驛。夢子文。舉幃。嘔蹙。挽之。不可。冉冉。悲啼。而沒。久之。得故人書。云。子文死矣。按其日。則宿奉高驛時也。旣歸。遊鷺嶺。作漁家傲。以寄情。云。鷺嶺峯前。欄獨倚。愁眉促。損愁腸碎。紅粉佳人。傷別袂。情何已。登山臨水。年年是。常記同來。今獨至。孤舟晚颺。湖光裏。衰草斜陽。無限意。誰與寄。

西湖水是相思淚

同上